

ATENTATUA TOLOSAN. Eusko Jaurlaritzako bozeramaileak «gogor» gaitzetsi du atentatua

Ertzaintzak eltze bat leherrarazi zuen herenegun Tolosako epaitegi aurrean

ETAren asmoa epaileak «kikiltzea» dela, baina legeak dioena «beteko» dutela esan du APMk

Erredakzioa | DONOSTIA

Ertzaintzak presio-eltze bat leherrarazi zuen, herenegun gauerdian, Tolosako epaitegiaren aurrean, modu kontrolatuan. Ertzaintzak esan duenez, Gara egunkariak telefono dei bat jaso zuen ETAren izenean, 22:30ak aldera, handik ordubetera Tolosako epaitegiaren lehergailu batek eztanda egingo zuela ohartaraziz.

Ertzaintzak epaitegia eta inguruak jendez hustu zituen, eta, lehergailua aurkitu ondoren, kontrolpean zartarazi zuen, kalte material handirik eragin gabe. Polizia zinta goizaldeko 03:00ak aldera altxatu zuten.

Jaurlaritzako Herrizaingo Sailaren esanetan, presio-eltzeak 10 kilo lehergai zituen: bost kilo kloratita eta bost dinamita, eta erlojua jarrita.

Gaitzespenak ugari

Josu Jon Imaz Eusko Jaurlaritzako bozeramaileak «gogor» gaitzetsi zuen atentatua, eta kalte material eta gizatiarrik ez zelako izan eskerrak eman. Batasunaren lege kanporatzearen erantzuna izan daitekeen edo ez esatera ez zen ausartu, «gai hauetan atxiki genezakeen baino logika deabruzkoagoa baitu ETAk», Imazen esanetan.

Onintza Lasa EAko legebiltzarkide eta komunikazio arduradunaren esanetan, ekintza mota hori ez da «ezer eraikitze» bidea: ez nazioa, ez Euskal Herria eta ez ezer». Bere esane-



Tolosako epaitegia, iazko martxoan jasandako atentatuaren ondoren.

tan, indarkeria metodoek «ez dute ezer baikor eta eraikitzaile-rik ekarriko», eta irtenbidea «el-karrizketatik» etorriko dela esan zuen, «bide politiko eta demokratikoetatik».

Juan Sanchez Vallejo EB-IU-ko zuzendaritzaren bozeramaileak «ETAk, Batasunaren ekina bertan bera utzi ondoren autoritate moralik duela uste badu, oker» dagoela esan zuen, atentatua gaitzetsiz. «Euskal gizarteak ETArri ezetz» askotan esan diola erantsi zuen, eta horrelako ekintzak dauden bitartean «hala egiten jarraituko duela» gaine-

ratu, «gizarteak badakielako hori ez dela bakerako bidea». ETAk egin dezakeen onena «desegitea» dela esan du.

Rodolfo Ares PSE-EEko legebiltzarkidearen ustez, «ETAren eta babesten dutenen aurka ahalik eta bateratuen aritzeko moduak» behar dira. «Demokratek demokrazia eta askatasuna» defenditu behar dituztela esan zuen, «batez ere Euskadin». Aresen esanetan, «ETAren eta bere metodoak babesten dituztenen helburu bakarra Euskal Herrian demokrazia eta askatasuna suntsitzea» da.

Maria Concepcion Cacho APMren (Magistratuen Elkarte Profesionala) EAeko lehendakariak esan zuen ETAren atentatua Arnaldo Otegi Batasuneko bozeramaileak «Espainiako legalitatearen aurka bidalitako mezuen» erantzuna izan dela. Herrizaingo Sailak «epaitegien zaintza indartzea» espero duela esan zuen. APMko ordezkariak nabarmendu zuenez, ETAren asmoa «epaileak kikiltzea» da, «baina ez dute lortuko», eta magistratuek legeak esaten duena «exekutatu eta bete» egingo dute.

EUSKAL PRESOK

Erietxetik Iruñeko espetxera eraman dute Barandalla

Erredakzioa | IRUÑA

Bautista Barandalla Etxarri-Aranazko preso erietxetik Iruñeko espetxera eraman dute berriro, Etxerat-ek jakinarazi duenez. Barandalla abuztuaren 20an eraman zuten Nafarroako Ospitalera, butxadura baten ondorioz, eta sonda eta sueroa jarri behar izan zizkieten. Atzo, bere osasunak onera egin duenez, senda-agi-ria eman eta berriro espetxera eraman zuten. Etxerat-en hitzetan, «preso etxarriarra kaleratu orde z nahiago dute espetxetik erietxera eta erietxetik espetxera ibili».

Etxerat-ek Barandallak Nafarroako Ospitalean egin duen denboran jasandako tratua «nabarmendu» nahi izan du: Espainiako Poliziak «senitartekoei baimendutako lau orduko bisitak ukatu nahi izan baititu».

Etxerat kezkatuta agertu da, Barandalla «ez kaleratzearen ondorioz» berri ere erietxera «noiz emango duten» zain dardelako, presoak kolitis ultzeraduna gaixotasun larri eta sendaezina baitu.

Barandallaren egoera «euskal presoek erietxean jasandakoaren erakusle» soil bat besterik ez da, Etxeraten hitzetan. Barandallari, Koldo Elizetxei eta Sergio Fernandezi 92. artikulua aplikatzeko eskatu dute.

ATXILOKETAK. Espainiako Justiziak gaur aurkeztuko du estradizio eskaera

Jose Angel Otxoantesanak eta bere emazteak atxiloturik jarraitzen dute Baionan

Erredakzioa | BAIONA

Kirru Otxoantesana eta bere emazte Beatriz Fernandezek Baionako jendarmerian atxiloturik jarraitzen zuten atzo arratsaldean. Otxoantesana, ETAko ustezko kidea, emaztearekin eta hiru urteko semearekin zegoen Frantziako Poliziak Bidarteko kanpaleku batean atxilotu zuelarik, herenegun goizean. Bertze iturri batzuen arabera, ordea, igande gaueko

23:00etan izan ziren atxilotetak, bidean. Otxoantesanak 48 urte ditu, eta Ondarroan (Bizkaia) jaioa da.

Gisa guziz, atxiloteta Laurence Levert epailearen aginduz gertatu zen. Levert epaileak «gaiztagin elkarteko kide izatea eta armak edukitzea» leporatzen dio Otxoantesanari. Nazioarteko atxilotze agindua baze- goen bere aurka.

Espainiako Auzitegi Nazional-eko fiskalak Otxoantesanaren

aurkako estradizio eskaera helaraziko dio, gaur bertan, Frantziako justiziari. Espainiako justiziak «dokumentazio faltsuen egitea» eta ETAren «logistika aparatuko partaide» izatea leporatzen dio.

Frantziako Polizia iturrien arabera, Otxoantesanari 70eko hamarkadan Bizkaian atentatuak egitea leporatzen dio Espainiako justiziak, eta bere atxiloteta, iazko irailean Akizen gertatutako atxilotetekin lotua da. Polizi operazio hartan, bertzeak bertze, Asier Oiartzabal Txapartegi atxilotu zuen Poliziak, ustez ETAren barnean Iñaki Gracia Arregiren lekua hartu zuena.



ZORIONAK ETA ESKERRIK ASKO

Bilbotar gustillo, konpartsetako kideoi, jaietan lanean aritu zaretenoi, udaleko langileoi eta ASTE NAGUSIAN Bilbora etorri zareten guzti gustioi. Zorionak eta Eskerrik asko.

I. Azkuna
Bilboko Alkatea



Aste Nagusia
Abuztuak 17-25 Agosto

